

# বিবিধ কাব্য

মাইকেল মধুসূদন দত্ত



প্রকাশ কালঃ ১৯৪০

Made with ❤️ by টেলি বই 🇮🇳

✓ [t.me/bongboi](https://t.me/bongboi)

এ ধরনের আরও বই পান ▶▶ [এখানে](#)।

🐱 Generated from [WikiSource](#)

1. [শিরোনাম](#)
2. [বিবিধ কাব্য](#)
3. [বর্ষাকাল](#)
4. [হিমঋতু](#)
5. [রিজিয়া](#)
6. [কবি-মাতৃভাষা](#)
7. [আত্ম-বিলাপ](#)
8. [বঙ্গভূমির প্রতি](#)
9. [ভারতবৃত্তান্তঃ](#)
10. [সুভদ্রা-হরণ](#)
11. [ময়ূর ও গৌরী](#)
12. [কাক ও শূগালী](#)
13. [রসাল ও স্বর্ণ-লতিকা](#)
14. [অশ্ব ও কুরঙ্গ](#)
15. [দেবদৃষ্টি](#)
16. [গদা ও সদা](#)
17. [কুক্কট ও মণি](#)
18. [সূর্য্য ও মৈনাক-গিরি](#)
19. [মেঘ ও চাতক](#)
20. [পীড়িত সিংহ ও অন্যান্য পশু](#)
21. [সিংহ ও মশক](#)
22. [ঢাকাবাসীদিগের অভিনন্দনের উত্তরে](#)
23. [পুরুলিয়া](#)
24. [পরেশনাথ গিরি](#)
25. [কবির ধর্ম্মপুত্র](#)
26. [পঞ্চকোটস্য রাজশ্রী](#)
27. [পঞ্চকোট-গিরি বিদায়-সঙ্গীত](#)
28. [সমাধি-লিপি](#)
29. [পাণ্ডববিজয়](#)
30. [দুর্য্যোধনের মৃত্যু](#)
31. [সিংহল-বিজয়](#)
32. [হতাশা-পীড়িত হৃদয়ের দুঃখধ্বনি](#)
33. [দেবদানবীয়ম্](#)
34. [জীবিতাবস্থায় অনাদৃত কবিগণের সম্বন্ধে](#)
35. [পণ্ডিতবর শ্রীযুক্ত ঈশ্বরচন্দ্র বিদ্যাসাগর](#)

36. পঞ্চকোট গিরি

37. সম্পর্কে

1. বিবিধ কাব্য

2. সম্পর্কে

# বিবিধ—কাব্য

মাইকেল মধুসূদন দত্ত

সম্পাদক :  
শ্রীব্রজেন্দ্রনাথ বন্দ্যোপাধ্যায়  
শ্রীসজনীকান্ত দাস



বঙ্গীয়-সাহিত্য-পরিষৎ  
২৪৩।১, আপার সারকুলার রোড  
কলিকাতা

প্রকাশক  
শ্রীরামকমল সিংহ  
বঙ্গীয়-সাহিত্য-পরিষৎ

ফাল্গুন, ১৩৪৭  
চারি আনা

মুদ্রাকর—শ্রীসৌরীন্দ্রনাথ দাস  
শনিরঞ্জন প্রেস, ২৫।২ মোহনবাগান রো, কলিকাতা  
৩.২ - ১০।৩।১৯৪১

---

## ভূমিকা

মধুসূদনের সাহিত্য-জীবন নানা কারণে নানা ভাবে খণ্ডিত ও বাধাগ্রস্ত হইয়াছিল। চিঠিপত্রে প্রকাশিত তাঁহার বহুবিধ সঙ্কল্প, পরিণামে সেগুলির বিফলতা এবং তাঁহার বিবিধ অসম্পূর্ণ কাব্য ও কবিতায় তাহার প্রমাণ পাওয়া যায়। তিনি নানা সময়ে বিশেষ উৎসাহের সঙ্গে অনেকগুলি কাব্য ও কবিতা রচনা আরম্ভ করিয়াছিলেন কিন্তু শেষ করিতে পারেন নাই। এই অসম্পূর্ণ কাব্যগুলির মধ্যে তাহার ‘বীরাঙ্গনা কাব্য’ ও নীতিগর্ভ কবিতাবলীই আমাদের বিশেষ আক্ষেপের কারণ হইয়া আছে। বর্তমান সংস্করণ গ্রন্থাবলীর এই বিবিধ খণ্ডি কবি মধুসূদনের বিরাট সম্ভাবনার ও বিপুল নৈরাশ্যের নিদর্শন।

এই বিক্ষিপ্ত কবিতা ও কাব্যংশগুলি আমরা নানা স্থান হইতে সংগ্রহ করিয়াছি। কবির জীবিতকালে বিভিন্ন সাময়িক-পত্রে ইহাদের কয়েকটি মাত্র প্রকাশিত হইয়াছিল; বাকিগুলি তাঁহার মৃত্যুর পরেই প্রকাশিত হইয়াছে। সাময়িক-পত্রে সবগুলি বাহির হয় নাই। ‘জীবন-চরিতে’ ও ‘মধুস্মৃতি’তে অধিকাংশই স্থান পাইয়াছে। একই কবিতার কোন কোন স্থানে দুইরূপ পাঠ পাওয়া গিয়াছে। কয়েকটি অসম্পূর্ণ কবিতা মধুসূদনের ‘চতুর্দশপদী কবিতাবলী’র ১ম সংস্করণের (১৮৬৬) পরিশিষ্টে “অসমাপ্ত কাব্যাবলি” নামে বাহির হইয়াছিল। দীননাথ সান্যাল-সম্পাদিত ‘চতুর্দশপদী কবিতাবলী’র শেষে একটি অপ্রকাশিত-পূর্ব কবিতা আছে; নগেন্দ্রনাথ সোম সেটি সংগ্রহ করিয়া দিয়াছিলেন। আমরা এই খণ্ডে এই সকলগুলিই একত্র সন্নিবিষ্ট করিলাম। কবিতাগুলিকে যত দূর সম্ভব, কালানুক্রমিক সাজাইবার চেষ্টা করিয়াছি। যে যে স্থান হইতে কবিতাগুলি সংগৃহীত হইয়াছে, নিম্নে তাহার নির্দেশ দিলাম। “যো” বলিতে [যোগীন্দ্রনাথ বসু](#)-প্রণীত ‘জীবন-চরিত’ চতুর্থ সংস্করণ এবং “ন” বলিতে নগেন্দ্রনাথ সোম-প্রণীত ‘মধু-স্মৃতি’ বুঝিতে হইবে।

১। বর্ষাকাল	যে	পৃ. ১০০-১
২। হিমঝড়	ঐ	পৃ. ১০১
৩। রিজিয়া	ঐ	পৃ. ৬৭৮-৮০
৪। কবি-মাতৃভাষা	ঐ	পৃ. ৪৭৭
৫। আত্ম-বিলাপ	—তত্ত্ববোধিনী পত্রিকা, ১৭৮৩ শক, আশ্বিন	
৬। বঙ্গভূমির প্রতি	—সোমপ্রকাশ, ১৬ জুন, ১৮৬২	
৭-৮। ভারত-বৃত্তান্ত	— দ্রৌপদীস্বয়ম্বর	—প্রবাসী, ভাদ্র ১৩১১
৯।	—মৎস্যগন্ধা	—আর্য্যদর্শন, ফাল্গুন পৃ. ২৮৮

		১২৯০,	
১০। সুভদ্রা-হরণ	—চতুর্দশপদী কবিতাবলী,	১ম সংস্করণ,	পৃ. ১০১-৪
১১। নীতিগর্ভ কাব্য	—ময়ূর ও গৌরী	ঐ	পৃ. ১১৪-৬
১২।	—কাক ও শৃগালী	ঐ	পৃ. ১১৭-৮
১৩।	—রসাল ও স্বর্ণলতিকা	ঐ	পৃ. ১১৮-২২
১৪।	—অশ্ব ও কুরঙ্গ	যো.	পৃ. ৫৯৪
১৫।	—দেবদৃষ্টি	ন.	পৃ. ৫২৮-৩২
১৬।	—গদা ও সদা —প্রবাসী,	আশ্বিন ১৩১১,	পৃ. ২৯৪-৯৫
১৭।	—কুক্কট ও মণি চতুর্দশপদী,	দীননাথ,	পৃ. ৯৮
১৮।	—সূর্য ও মৈনাক-গিরি	ঐ	পৃ. ৯৯-১০১
১৯।	—মেঘ ও চাতক	ঐ	পৃ. ১০২-৪
২০।	—পীড়িত সিংহ ও অন্যান্য পশু	ঐ	পৃ. ১০৫-৬
২১।	—সিংহ ও মশক	ঐ	পৃ. ৯৫-৭
২২। ঢাকাবাসীদিগের অভিনন্দনের উত্তরে		যো.	পৃ. ৬০৬-৭
২৩। পুরুলিয়া	জ্যোতিরঙ্গণ,	এপ্রিল ১৮৭২,	পৃ. ১১৭
২৪। পরেশনাথ গিরি	আর্যদর্শন,	আষাঢ় ১২৮১,	আশ্বিন ১২৯১
২৫। কবির ধর্মপুত্র	জ্যোতিরঙ্গণ,	নবেম্বর ১৮৭২,	পৃ. ৪০
২৬। পঞ্চকোট গিরি		ন.	পৃ. ৫২২
২৭। পঞ্চকোটস্য রাজশ্রী		ন.	পৃ. ৫২৩
২৮। পঞ্চকোট-গিরি বিদায়-সঙ্গীত		ন.	পৃ. ৫২৩-৪
২৯। সমাধি-লিপি		যো.	পৃ. ৬৩৯
৩০। পাণ্ডব-বিজয়	আর্যদর্শন	আষাঢ় ১২৯১	
৩১। দুর্যোধনের মৃত্যু	ঐ	চৈত্র ১২৮৯	





<u>পীড়িত সিংহ ও অন্যান্য পশু</u>	...	<u>৩৫</u>
<u>সিংহ ও মশক</u>	...	<u>৩৬</u>
<u>ঢাকাবাসীদের অভিনন্দনের উত্তরে</u>		<u>৩৮</u>
<u>পুরুলিয়া</u>	...	<u>৩৮</u>
<u>পরেশনাথ গিরি</u>	...	<u>৩৯</u>
<u>কবির ধর্মপুত্র</u>	...	<u>৪০</u>
<u>পঞ্চকোটস্য রাজশ্রী</u>	...	<u>৪১</u>
<u>পঞ্চকোট-গিরি বিদায়-সঙ্গীত</u>	...	<u>৪২</u>
<u>সমাধি-লিপি</u>	...	<u>৪২</u>
<u>পাণ্ডববিজয়</u>	...	<u>৪৩</u>
<u>দুর্যোধনের মৃত্যু</u>	...	<u>৪৪</u>
<u>সিংহল-বিজয়</u>	...	<u>৪৬</u>
<u>হতাশা-পীড়িত হৃদয়ের দুঃখধ্বনি</u>	...	<u>৪৭</u>
<u>দেবদানবীয়ম্</u>	...	<u>৪৮</u>
<u>জীবিতাবস্থায় অনাদৃত কবিগণের সম্বন্ধে</u>	...	<u>৪৮</u>
<u>পণ্ডিতবর শ্রীযুক্ত ঈশ্বরচন্দ্র বিদ্যাসাগর</u>	...	<u>৪৯</u>

## দুরূহ শব্দ ও বাক্যাংশের ব্যাখ্যা

### পংক্তি

<u>বর্ষাকাল:</u>	৩	<u>রমণ</u> —পুরুষ।
	৪	<u>দানবাদি দেব</u> ,—দানবাদি, দেব, সঙ্গত।
<u>হিমঝড়:</u>	১	<u>হিমন্তের</u> —হেমন্তের (মধুসূদনের প্রয়োগ)।
<u>রিজিয়া:</u>	৬	<u>দংশে</u> —দংশ সঙ্গত।
	২৩	<u>সিন্ধুদেশে</u> —সমুদ্রে।
<u>কবি-মাতৃভাষা:</u>		মধুসূদন-বিরচিত প্রথম চতুর্দশপদী কবিতা। ইহারই সংশোধিত রূপ “বঙ্গ-ভাষা” ( <u>চতুর্দশপদী কবিতাবলী</u> , ৩ নং কবিতা)।
<u>আত্ম-বিলাপ:</u>	১২	<u>অম্মুখে সদ্যঃপাতি</u> —জলের তোড়ে সদ্য সদ্য বিনাশশীল।

	১৯	<u>সাদে</u> —সাধে।
<u>বঙ্গভূমির প্রতি:</u>	২৫	<u>তামরস</u> —পদ্ম।
<u>দ্রৌপদীস্বয়ম্বর:</u>	১৭	<u>বিকচিত</u> —বিকচ (মধুসূদনের প্রয়োগ)।
	১৮	<u>দ্বিতীয়</u> —রামায়ণকার বাল্মীকি আদি-কবি বলিয়া মহাভারতকারকে মধুসূদন 'দ্বিতীয় কমল' বলিয়াছেন।
<u>সুভদ্রা-হরণ:</u>	৩-১৫	দ্রৌপদীস্বয়ম্বরের প্রায় পুনরুক্তি।
	২০	<u>শ্রীবরদা</u> —লক্ষ্মী।
<u>ময়ূর ও গৌরী:</u>	৩০	<u>কেশে</u> —মস্তকে।
<u>কাক ও শূগালী:</u>	২৩	<u>বাস-বসে</u> —রাস রসে হইবে।
<u>অশ্ব ও কুরঙ্গ:</u>	১০	<u>বাগানে</u> —মুদ্রাকর-প্রমাদ; বাথানে হইবে।
	৩৬	<u>মৃগয়ী</u> —ব্যাধ।
	৫৪	<u>সাদী</u> —অশ্বারোহী।
<u>গদা ও সদা:</u>	১৭	<u>সিন্ধু অনুসিন্ধু</u> —সুন্দ উপসুন্দ হইবে।
	৭১	<u>লভিল</u> —লভিলা হইবে।
<u>ঢাকাবাসীদিগের</u>		
<u>অভিনন্দনের</u>	১০	<u>কারো</u> —মুদ্রাকর-প্রমাদ; কারে হইবে।
<u>উত্তরে:</u>		
<u>পুরুলিয়া:</u>	৫	<u>সরস</u> —সরোবরে।
	১৪	<u>সত্যতা</u> —সভ্যতা হইবে।
<u>কবির ধর্মপুত্র:</u>	১১	<u>তোলি</u> —তুলিয়া।
<u>পঞ্চকোট গিরি:</u>	১০	<u>তোমায়</u> —তোমারে হইবে।
<u>পঞ্চকোটস্য</u>		
<u>রাজশ্রী:</u>		চতুর্থ ও পঞ্চম পংক্তি যথাক্রমে পঞ্চম ও চতুর্থ পংক্তি হইবে।
<u>দুর্যোধনের মৃত্যু:</u>	২৫	<u>সর্বভুক</u> —সর্বভুক হইবে।
	৪৬-৪৭	নিম্নলিখিত রূপ হইবে—

যে স্তম্ভের বলে শির উঠায় আকাশে  
উচ্চ রাজ-অটালিকা, সে স্তম্ভের রূপে

জীবিতাবস্থায়...: 8 ওমর—হোমার।

---

## বর্ষাকাল

গভীর গর্জন সদা করে জলধর,  
উথলিল নদনদী ধরণী উপর।  
রমণী রমণ লয়ে, সুখে কেলি করে,  
দানবাদি দেব, যক্ষ সুখিত অন্তরে।  
সমীরণ ঘন ঘন ঝন ঝন রব,  
বরুণ প্রবল দেখি প্রবল প্রভাব।  
স্বাধীন হইয়া পাছে পরাধীন হয়,  
কলহ করয়ে কোন মতে শান্ত নয়॥

## হিমঝতু

হিমন্তের আগমনে সকলে কম্পিত,  
রামাগণ ভাবে মনে হইয়া দুঃখিত।  
মনাগুনে ভাবে মনে হইয়া বিকার,  
নিবিল প্রেমের অগ্নি নাহি জ্বলে অার।  
ফুরায়েছে সব অাশা মদন রাজার  
অাসিবে বসন্ত অাশা—এই অাশা সার।  
অাশায় অাপ্রিত জনে নিরাশ করিলে,  
অাশাতে আশার বস অাশায় মারিলে।  
সৃজিয়াছি অাশাতরু অাশিত হইয়া,  
নষ্ট কর হেন তরু নিরাশ করিয়া।  
যে জন করয়ে আশা, অাশার অাশ্বাসে,  
নিরাশ করয়ে তারে কেমন মানসে॥

## রিজিয়া

হা বিধি, অধীর অামি! অধীর কে কবে,  
এ পোড়া মনের জ্বালা জুড়াই কি দিয়া?  
হে স্মৃতি, কি হেতু যত পূর্বকথা কয়ে,  
দ্বিগুণিছ এ আগুন, জিজ্ঞাসি তোমারে।  
কি হেতু লো বিষদন্ত ফণিরূপ ধরি,  
মুহূর্মুহু দংশে আজি জর্জরি হৃদয়ে?  
কেমনে, লো দুষ্টা নারি, ভুলিলি নিষ্ঠুরে  
আমায়? সে পূর্ব সত্য, অঙ্গীকার যত,  
সে অাদর, সে সোহাগ, সে ভাব কেমনে  
ভুলিল ও মন তোর, কে কবে অামারে?  
হায় লো সে প্রেমাঙ্কুর কি তাপে শুকাল?  
এ হেন সুবর্ণ-দেহে কি সুখে রাখিলি  
এ হেন দুরন্ত আত্মা, রে দুরাত্মা বিধি!  
এ হেন সুবর্ণময় মন্দিরে স্থাপিলি  
এ হেন কু-দেবতারে তুই কি কৌতুকে?  
কোথা পাব হেন মন্ত্র যার মহাবলে  
ভুলি তোরে, ভূত কাল, প্রমত্ত যেমতি  
বিস্মরে (সুরার তেজে, যা কিছু সে করে)  
জ্ঞানোদয়ে? রে মদন, প্রমত্ত করিলি  
মোরে প্রেম-মদে তুই; ভুলা তবে এবে,  
ঘটিল যা কিছু, যবে ছিনু জ্ঞান-হীনে।  
এ মোর মনের দুঃখ কে আছে বুঝিবে?  
বন্ধুমাত্র মোর তুই, চল্ সিন্ধুদেশে,  
দেখিব কি থাকে ভাগ্যে! হয়ত মারিব,

এ মনাগ্নি নিবাইব ঢালি লহ-স্রোতে,  
নতুবা, রে মৃত্যু, তোর নীরব সদনে  
ভুলিব এ মহাজ্বালা—দেখিব কি ঘটে!  
কি কাজ জীবনে আর! কমল বিহনে  
ডুবে অভিমানে জলে মৃগাল, যদ্যপি  
হরে কেহ শিরোমণি, মরে ফণী শোকে।

চূড়াশূন্য রথে চড়ি কোন্ বীর যুঝে?  
কি সাধ জীবনে আর? রে দারুণ বিধি,  
অমৃত যে ফলে, আজ বিষাক্ত করিলি  
সে ফলে? অনন্ত আয়ুদায়িনী সুধারে  
না পেয়ে, কি হলাহল লভিনু মথিয়া  
অকুল সাগরে, হয় হিয়া জ্বালাইতে?  
হা ধিক্! হা ধিক্ তোরে নারীকুলাধমা!  
চণ্ডালিনী ব্রহ্মকুলে তুই পাপীয়সী,  
আর তোর পোড়া মুখ কভু না হেরিব,  
যত দিন নাহি পারি তোর যমরূপে  
আক্রমিতে রণে তোরে বীরপরাক্রমে!  
ভেবেছিঁ লয়ে তোরে সোহাগে বাসরে  
কত যে লো ভালবাসি কব তোর কানে,  
বায়ু যথা ফুলদলে সায়ংকালে পেয়ে  
কাননে। সে প্রেমাশায় দিনু জলাঞ্জলি।  
সে সুবর্ণ আশালতা তুই লো নিষ্ঠুরা  
দাবানল-শিখারূপে নিষ্ঠুরে পোড়ালি!  
পশ্ রে বিবরে তোর, তুই কাল ফণী।

## কবি-মাতৃভাষা

নিজাগারে ছিল মোর অমূল্য রতন  
অগণ্য; তা সবে আমি অবহেলা করি,  
অর্থলোভে দেশে দেশে করিনু ভ্রমণ,  
বন্দরে বন্দরে যথা বাণিজ্যের তরী।  
কাটাইনু কত কাল সুখ পরিহরি,  
এই ব্রতে, যথা তপোবনে তপোধন,  
অশন, শয়ন ত্যজে, ইষ্টদেবে স্মরি,  
তাঁহার সেবায় সদা সাঁপি কায় মন।  
বঙ্গকুল-লক্ষ্মী মোরে নিশার স্বপনে  
কহিলা—“হে বৎস, দেখি তোমার ভকতি,  
সুপ্রসন্ন তব প্রতি দেবী সরস্বতী।  
নিজ গৃহে ধন তব, তবে কি কারণে  
ভিখারী তুমি হে আজি, কহ ধন-পতি?  
কেন নিরানন্দ তুমি আনন্দ-সদনে?”



## আত্ম-বিলাপ

আশার ছলনে ভুলি      কি ফল লভিনু, হায়,  
   তাই ভাবি মনে?  
জীবন-প্রবাহ বহি      কাল-সিঙ্ঘু পানে যায়,  
   ফিরাব কেমনে  
দিন দিন আয়ুহীন,      হীনবল দিন দিন,—  
তবু এ আশার নেশা ছুটিল না? এ কি দায়!

২

রে প্রমত্ত মন মম! কবে পোহাইবে রাতি?  
   জাগিবি রে কবে?  
জীবন-উদ্যানে তোর যৌবন-কুসুম-ভাতি  
   কত দিন রবে?  
নীর-বিন্দু দুর্বাদলে, নিত্য কি রে ঝলঝলে?  
কে না জানে অম্মুবিষ অম্মুখে সদ্যঃপাতি?

৩

নিশার স্বপন-মুখে সুখী যে, কি সুখ তার?  
   জাগে সে কাঁদিতে।  
ক্ষণপ্রভা প্রভা-দানে বাড়ায় মাত্র আঁধার  
   পথিকে ধাঁদিতে!  
মরীচিকা মরুদেশে, নাশে প্রাণ তৃষাক্লেশে —  
এ তিনের ছল সম ছল রে এ কু-আশার।

প্রেমের নিগড় গড়ি পরিলি চরণে সাদে;  
 কি ফল লভিলি?  
 জ্বলন্ত-পাবক-শিখা-লোভে তুই কাল-ফাঁদে  
 উড়িয়া পড়িলি!  
 পতঙ্গ যে রঙ্গে ধায়, ধাইলি, অবোধ, হায়!  
 না দেখিলি, না শুনিলি, এবে রে পরাণ কাঁদে

বাকী কি রাখিলি তুই বৃথা অর্থ-অন্বেষণে,  
 সে সাধ সাধিতে?  
 ক্ষত মাত্র হাত তোর মৃগাল-কণ্টকগণে  
 কমল তুলিতে!  
 নারিলি হরিতে মণি, দংশিল কেবল ফণী!  
 এ বিষম বিষজ্বালা ডুলিবি, মন, কেমনে!

যশোলাভ লোভে আয়ু কত যে ব্যয়িলি হায়,  
 কব তা কাহারে?  
 সুগন্ধ কুসুম-গন্ধে অন্ধ কীট যথা ধায়,  
 কাটিতে তাহারে,—  
 মাৎসর্য্য-বিষদশন, কামড়ে রে অনুক্ষণ!  
 এই কি লভিলি লাভ, অনাহারে, অনিদ্রায়?

মুকুতা-ফলের লোভে, ডুবে রে অতল জলে  
যতনে ধীবর,  
শতমুক্তাধিক আয়ু কালসিন্ধু জলতলে  
ফেলিস্, পামর!  
ফিরি দিবে হারাধন, কে তোরে, অবোধ মন,  
হায় রে, ভুলিবি কত আশার কুহক-ছলে!

## বঙ্গভূমির প্রতি

“My native Land, Good night!”—[Byron](#).  
রেখো, মা, দাসেরে মনে, এ মিনতি করি পদে।  
সাধিতে মনের সাদ,  
ঘটে যদি পরমাদ,  
মধুহীন করো না গো তব মনঃকোকনদে।  
প্রবাসে, দৈবের বশে,  
জীব-তারা যদি খসে  
এ দেহ-আকাশ হতে,— নাহি খেদ তাহে।  
জন্মিলে মরিতে হবে,  
অমর কে কোথা কবে,  
চিরস্থির কবে নীর, হায় রে, জীবন-নদে?  
কিন্তু যদি রাখ মনে,  
নাহি, মা, ডরি শমনে;  
মক্ষিকাও গলে না গো, পড়িলে অমৃত-হ্রদে!  
সেই ধন্য নরকুলে,  
লোকে যারে নাহি ভুলে,  
মনের মন্দিরে সদা সেবে সৰ্বজন —  
কিন্তু কোন্ গুণ আছে,  
যাচিব যে তব কাছে,  
হেন অমরতা আমি, কহ, গো, শ্যামা জন্মদে!  
তবে যদি দয়া কর,  
ভুল দোষ, গুণ ধর,  
অমর করিয়া বর দেহ দাসে, সুবরদে!—  
ফুটি যেন স্মৃতি-জলে,  
মানসে, মা, যথা ফলে  
মধুময় তামরস কি বসন্ত, কি শরদে!

## ভারত-বৃত্তান্ত দ্রৌপদীস্বয়ম্বর

VERSAILLES,  
9th September, 1863.

কেমনে রথীন্দ্র পার্থ স্ববলে লভিলা  
পরাভবি রাজবৃন্দে চারুচন্দ্রাননা  
কৃষ্ণায়, নবীন ছন্দে সে মহাকাহিনী  
কহিবে নবীন কবি বঙ্গবাসী জনে,  
বাগ্‌দেবি! দাসেরে যদি কৃপা কর তুমি।  
না জানি ভকতি স্তুতি, না জানি কি ক'রে  
আরাধি হে বিশ্বারাধ্যা তোমায়; না জানি  
কি ভাবে মনের ভাব নিবেদি ও পদে!  
কিন্তু মার প্রাণ কভু নারে কি বুঝিতে  
শিশুর মনের সাধ, যদিও না ফুটে  
কথা তার? উর তবে, উর মা, আসরে।  
আইস মা এ প্রবাসে বঙ্গের সঙ্গীতে  
জুড়াই বিরহজ্বালা, বিহঙ্গম যথা  
রঙ্গহীন কুপিঞ্জরে কভু কভু ডুলে  
কারাগারদুখ সাধি কুঞ্জবনস্বরে।  
সত্যবতীসতীসুত, হে গুরু, ভারতে  
কবিতা-সুধার সরে বিকচিত চির  
কমল দ্বিতীয় তুমি; কৃতাঞ্জলিপুটে  
প্রণমে চরণে দাস, দয়া কর দাসে।  
হায় নরাধম অামি! ডরি গো পশিতে  
যথায় কমলাসনে আসীনা দেউলে  
ভারতী; তেঁই হে ডাকি দাঁড়য়ে দুয়ারে,  
আচার্য্য। আইস শীঘ্র দ্বিজোত্তম সুরি।

দাসের বাসনা, ফুলে পুজি জননীরে,  
বর চাহি দেহ ব্যাস, এই বর মাগি।  
গভীর সুড়ঙ্গপথে চলিলা নীরবে

পঞ্চ ভাই সঙ্গে সতী ভোজেন্দ্রনন্দিনী  
কুন্তী; স্বরচিত-গৃহে মরিল দুস্মৃতি  
পুরোচন; \* \* \*

## দ্রৌপদীস্বয়ম্বর

কেমনে রথীন্দ্র পার্থ পরাভবি রণে  
লক্ষ রণসিংহ শূরে পাঞ্চাল নগরে  
লভিলা দ্রুপদবালা কৃষ্ণ মহাধনে,  
দেবের অসাধ্য কৰ্ম সাধি দেববরে,—  
গাইব সে মহাগীত। এ ভিক্ষা চরণে,  
বাগ্‌দেবি! গাইব মা গো নব মধুস্বরে,  
কর দয়া, চিরদাস নমে পদাম্বুজে,  
দয়ায় আসরে উর, দেবি শ্বেতভুজে!

\* \* \*

বিঁধিলা লক্ষ্যেপরে পার্থ, আকাশে অন্সরী  
গাইল বিজয়গীত, পুষ্পবৃষ্টি করি  
আকাশসম্ভবা দেবী সরস্বতী আসি  
কহিলা এ সব কথা কৃষ্ণারে সম্ভাষি।

লো পঞ্চালরাজসুতা কৃষ্ণা গুণবতি,  
তব প্রতি সুপ্রসন্ন আজি প্রজাপতি।  
এত দিনে ফুটিল গো বিবাহের ফুল।  
পেয়েছ সুন্দরি! স্বামী ভুবনে অতুল।

চেন কি উহারে উনি কোন্ মহামতি,  
কত গুণে গুণবান জানো কি লো সতি?  
না চেনো না জানো যদি শুন দিয়া মন,  
ছদ্মবেশী উনি ধনি, নহেন ব্রাহ্মণ।  
অত্যাচ ভারতবংশশিরে শিরোমণি  
কুন্তীর হৃদয়নিধি বিখ্যাত ফাল্গুনি।  
ভস্মরাশি মাঝে যথা লুপ্ত হতাশন  
সেইরূপ ক্ষত্রতেজ আছিল গোপন।

আগ্নেয়গিরির গর্ভ করি বিদারণ  
যথা বেগে বাহিরয় ভীম হতাশন,  
অথবা ভেদিয়া যথা পুরব গগন  
সহসা আকাশে শোভে জ্বলন্ত তপন,  
সেইরূপ এত দিনে পাইয়া সময়,  
লুপ্ত ক্ষত্রতেজ বহি হইল উদয়।

### মৎস্যগন্ধা

চেয়ে দেখ, মোর পানে, কলকল্লোলিনি  
যমুনে! দেখিয়া, কহ, শুনি তব মুখে,  
বিধুমুখি, আছে কি গো অখিল জগতে,  
দুঃখিনী দাসীর সম? কেন যে সৃজিলা,—  
কি হেতু বিধাতা, মোরে, বুঝিব কেমনে?  
তরুণ যৌবন মোর! না পারি লড়িতে  
পোড়া নিতম্বের ভরে। কবরীবন্ধন  
খুলি যদি, পোড়া চুল পড়ে ভূমিতলে।  
কিন্তু, কে চাহিয়া কবে দেখে মোর পানে?

না বসে গুঞ্জরি সখি, শিলীমুখ যথা  
শ্বেতাম্বরা ধুতুরার নীরস অধরে,  
হেরি অভাগীরে দূরে ফিরে অধোমুখে  
যুবকুল; কাদি আমি বসি লো বিরলে!

# সুভদ্রা-হরণ

প্রথম সর্গ

কেমনে ফাল্গুনি শুর স্বগুণে লভিলা  
(পরাভবি যদু-বৃন্দে) চারু-চন্দ্রাননা  
ভদ্রায়;—নবীন ছন্দে সে মহাকাহিনী  
কহিবে নবীন কবি বঙ্গবাসি-জনে,  
বাগ্‌দেবি, দাসেরে যদি কৃপা কর তুমি।  
না জানি ভকতি, স্তুতি; না জানি কি কয়ে,  
আরাধি, হে বিশ্বারাধ্যে, তোমায়; না জানি  
কি ভাবে মনের ভাব নিবেদি ও পদে!  
কিন্তু মার প্রাণ কভু নারে কি বুঝিতে  
শিশুর মনের সাধ, যদিও না ফুটে  
কথা তার? কৃপা করি উর গো আসরে।  
আইস, মা, এ প্রবাসে, বঙ্গের সঙ্গীতে  
জুড়াই বিরহ-জ্বালা, বিহঙ্গম যথা,  
কারাবন্ধ পিজিরায়, কভু কভু ভুলে  
কারাগার-দুখ, স্মরি নিকুঞ্জের স্বরে!  
ইন্দ্রপ্রস্থে পঞ্চ ভাই পাঞ্চালীতে লয়ে  
কৌতুকে করিলা বাস। আদরে ইন্দ্রিরা  
(জগত-আনন্দময়ী) নব-রাজ-পুরে

উরিলা; লাগিল নিত্য বাড়িতে চৌদিকে  
রাজ-শ্রী, শ্রীবরদার পদের প্রসাদে!—  
এ মঙ্গলবার্তা শুনি নারদের মুখে  
শচী, বরাঙ্গনা দেবী, বৈজয়ন্ত-ধামে  
রুষিলা। জ্বলিল পুনঃ পূর্বকথা স্মরি,  
দাবানল-রূপ রোষ হিয়া-রূপ বনে,  
দগধি পরাণ তাপে! “হা ধিক্!”—ভাবিলা  
বিরলে মানিনী মনে—“ধিক্ রে আমারে!  
আর কি মানিবে কেহ এ তিন ভুবনে  
অভাগিনী ইন্দ্রাণীতে? কেন তাকে দিলি  
অনন্ত-যৌবন-কান্তি, তুই, পোড়া বিধি?  
হায়, কারে কব দুখ? মোরে অপমানি,



ভোজ-রাজ-বালা কুন্তী—কুল-কলঙ্কিনী,—  
পাপীয়সী—তার মান বাড়ান কুলিশী?  
যৌবন-কুহকে, ধিক্, যে ব্যভিচারিণী  
মজাইল দেব-রাজে, মোরে লাজ দিয়া।  
অর্জুন-জারজ তার—নাহি কি শকতি  
আমার—ইন্দ্রাণী আমি—মারি সে অর্জুনে,  
এ পোড়া চখের বালি?—দুর্য্যোধনে দিয়া  
গড়াইনু জতুগৃহ; সে ফাঁদ এড়ায়ে  
লক্ষ্য বিধি, লক্ষ রাজে বিমুখি সমরে  
পাঞ্চালীরে মন্দমতি লভিল পঞ্চালে।  
অহিত সাধিতে, দেখ, হতাশ হইনু  
আমি, ভাগ্য-গুণে তার!—কি ভাগ্য? কে জানে  
কোন্ দেবতার বলে বলী ও ফাল্গুনি?  
বুঝি বা সহায় তার আপনি গোপনে  
দেবেন্দ্র? হে ধর্ম, তুমি পার কি সহিতে

এ আচার চরাচরে? কি বিচার তব!  
উপপত্নী কুন্তীর জারজ পুত্র প্রতি  
এত যত্ন? কারে কব এ দুখের কথা—  
কার বা শরণ, হয়, লব এ বিপদে?”  
কঙ্কণ-মণ্ডিত বাহু হানিলা ললাটে  
ললনা! দুকুল সাড়ী তিঁতি গলগলে  
বহিল আঁখির জল, শিশির যেমতি  
হিমকালে পড়ি আর্দ্রে কমলের দলে!  
“যাইব কলির কাছে” আবার ভাবিলা  
মানিনী—“কুটিল কলি খ্যাত ত্রিভুবনে,—  
এ পোড়া মনের দুঃখ কব তার কাছে,  
এ পোড়া মনের দুখ সে যদি না পারে  
জুড়াতে কৌশল করি, কে আর জুড়াবে?  
যায় যদি মান, যাক্। আর কি তা আছে?”

ইত্যাদি।

# নীতিগর্ভ কাব্য

## ময়ূর ও গৌরী

ময়ূর কহিল কাঁদি গৌরীর চরণে,  
কৈলাস-ভবনে;—  
“অবধান কর দেবি,  
আমি ভৃত্য নিত্য সেবি  
প্রিয়োত্তম সুতে তব এ পৃষ্ঠ-আসনে।  
রথী যথা দ্রুত রথে,  
চলেন পবন-পথে  
দাসের এ পিঠে চড়ি সেনানী সুমতি;

তবু, মা গো, আমি দুখী অতি!  
করি যদি কেকা-ধ্বনি,  
ঘৃণায় হাসে অমনি  
খেচর, ভূচর জন্তু;—মরি, মা, শরমে!  
ডালে মুঢ় পিক যবে  
গায় গীত, তার রবে  
মাতিয়া জগৎ-জন বাখানে অধমে!  
বিবিধ কুসুম কেশে,  
সাজি মনোহর বেশে,  
বরেন বসুধা দেবী যবে ঋতুবরে  
কোকিল মঙ্গল-ধ্বনি করে।  
অহরহ কুলধ্বনি বাজে বনস্থলে;  
নীরবে থাকি, মা, আমি; রাগে হিয়া জ্বলে  
ঘুচাও কলঙ্ক শুভঙ্করি,  
পুত্রের কিঙ্কর আমি এ মিনতি করি,  
পা দুখানি ধরি।”  
উত্তর করিলা গৌরী সুমধুর স্বরে;—  
“পুত্রের বাহন তুমি খ্যাত চরাচরে,  
এ আক্ষেপ কর কি কারণে?  
হে বিহঙ্গ, অঙ্গ-কান্তি ভাবি দেখ মনে!  
চন্দ্রককলাপে দেখ নিজ পুচ্ছ-দেশে;

রাখাল রাজার সম চূড়াখানি কেশে!  
আখণ্ডল-ধনুর বরণে  
মণ্ডিলা সু-পুচ্ছ ধাতা তোমার সৃজনে!  
সদা জ্বলে তব গলে  
স্বর্ণহার ঝল ঝলে,  
যাও, বাছা, নাচ গিয়া ঘনের গর্জনে,

হরষে স্ব-পুচ্ছ খুলি  
শিরে স্বর্ণ-চুড়া তুলি;  
\* \* করগে কেলি ব্রজ-কুঞ্জ-বনে।  
করতালি ব্রজাঙ্গনা  
দেবে রঙ্গে বরাঙ্গনা—  
তোষ গিয়া ময়ুরীরে প্রেম-আলিঙ্গনে!  
শুন বাছা, মোর কথা শুন,  
দিয়াছেন কোন কোন গুণ,  
দেব সনাতন প্রতি-জনে;  
সু-কলে কোকিল গায়,  
বাজ বজ্র-গতি ধায়,  
অপরূপ রূপ তব, খেদ কি কারণে?”—  
নিজ অবস্থায় সদা স্থির যার মন,  
তার হতে সুখীতর অন্য কোন জন?

## কাক ও শৃগালী

একটি সন্দেশ চুরি করি,  
উড়িয়া বসিলা বৃক্ষোপরি,  
কাক, হৃষ্ট-মনে;  
সুখাদ্যের বাস পেয়ে,  
আইল শৃগালী ধেয়ে,  
দেখি কাকে কহে দুষ্টা মধুর বচনে;—  
“অপরূপ রূপ তব, মরি!  
তুমি কি গো ব্রজের শ্রীহরি,—  
গোপিনীর মনোবাঞ্ছা?—কহ গুণমণি!

হে নব নীরদ-কান্তি,  
ঘুচাও দাসীর ভ্রান্তি,  
যুড়াও এ কান দুটি করি বেণু-ধ্বনি!  
পুণ্যবর্তী গোপ-বধু অতি।  
তৈঁই তীরে দিলা বিধি,  
তব সম রূপ-নিধি,—  
মোহ হে মদনে তুমি; কি ছার যুবতী?  
গাও গীত, গাও, সখে করি এ মিনতি!  
কুড়াইয়া কুসুম-রতনে,  
গাঁথি মালা সুচারু গাঁথনে,  
দোলাইয়া দিব তব \* \* \* \* [১]  
দাসীর সাধনে \* \*  
বাজাও মধুর \* \*  
বাস-বসে মাতি \* \* \* \* \*  
মজিল \* \* \*  
মুখ খুলি \* \* \*  
\* \* \* খে মু \* \* \*  
\* \* \* গীত আ \* \* \*

1. ↑ আদর্শপত্রের কয়েক স্থানে দৈবাৎ পোকায় কাটিয়া ফেলিয়াছে।

## রসাল ও স্বর্ণ-লতিকা

রসাল কহিল উচ্ছে স্বর্ণলতিকারে;—  
“শুন মোর কথা, ধনি, নিন্দ বিধাতারে!  
নিদারুণ তিনি অতি;  
নাহি দয়া তব প্রতি;  
তেঁই ক্ষুদ্র-কায়া করি সৃজিলা তোমারে!

মলয় বহিলে, হয়,  
নতশিরা তুমি তায়,  
মধুকর-ভরে তুমি পড় লো ঢলিয়া;  
হিমাদ্রি সদৃশ আমি,  
বন-বৃক্ষ-কুল-স্বামী,  
মেঘলোকে উঠে শির আকাশ ভেদিয়া!  
কালাগ্নির মত তপ্ত তপন তাপন,—  
আমি কি লো ডরাই কখন?  
দূরে রাখি গাভী-দলে,  
রাখাল অামার তলে  
বিরাম লভয়ে অনুক্ষণ,—  
শুন, ধনি, রাজ-কাজ দরিদ্র পালন!  
আমার প্রসাদ ভুঞ্জে পথ-গামী জন।  
কেহ অন্ন রাঁধি খায়  
কেহ পড়ি নিদ্রা যায়  
এ রাজ-চরণে।  
শীতলিয়া মোর ডরে  
সদা আসি সেবা করে  
মোর অতিথির হেথা আপনি পবন!  
মধু-মাখা ফল মোর বিখ্যাত ভুবনে!  
তুমি কি তা জান না, ললনে?  
দেখ মোর ডাল-রাশি,  
কত পাখী বাঁধে আসি  
বাসা এ আগারে।  
ধন্য মোর জনম সংসারে।

কিন্তু তব দুখ দেখি নিত্য আমি দুখী;  
নিন্দ বিধাতায় তুমি, নিন্দ, বিধুমুখি!”

\* \* \* মধুর স্বরে  
\* \* \* \* রে  
\* \* \* \* \* \* \* \* \* \*  
\* \* \* \* \* \* \* \* \* \*  
\* \* \* প্রভু  
\* \* \* দয়ামি \* \*  
\* \* \* যথা \* \*

যুদ্ধার্থ গম্ভীরতার বাণী তব পানে!  
সুধা-অাশে অাশে আলি,  
দিলে সুধা যায় চলি,—  
কে কোথা কবে গো দুখী সখীর মিলনে?”  
“ক্ষুদ্র-মতি তুমি অতি”  
রাগি কহে তরুপতি,  
“নাহি কিছু অভিমান? ধিক্ চন্দ্রাননে!”  
নীরবিলা তরুরাজ; উড়িল গগনে  
যমদূতাকৃতি মেঘ গম্ভীর স্বননে;  
আইলেন প্রভঞ্জন,  
সিংহনাদ করি ঘন,  
যথা ভীম ভীমসেন কৌরব-সমরে।  
আইল খাইতে মেঘ দৈত্যকুল রড়ে;  
ঐরাবত পিঠে চড়ি  
রাগে দাঁত কড়মড়ি,  
ছাড়িলেন বজ্র ইন্দ্র কড় কড় কড়ে!  
উরু ভাঙ্গি কুরুরাজে বধিলা যেমতি  
ভীম যোধপতি;  
মহাঘাতে মড় মড়ি  
রসাল ভূতলে পড়ি,

হায়, বায়ুবলে  
হারাইলা আয়ু-সহ দর্প বনস্থলে!  
উর্ধ্বশির যদি তুমি কুল মান ধনে;  
করিও না ঘৃণা তবু নীচশির জনে!  
এই উপদেশ কবি দিলা এ কৌশলে।



## অশ্ব ও কুরঙ্গ

১

অশ্ব, নবদুর্কীবাময় দেশে, বিহারে একেলা অধিপতি।  
নিত্য নিশা অবশেষে শিশিরে সরস দুর্কী অতি।  
বড়ই সুন্দর স্থল, অদূরে নির্ঝরে জল  
তরু, লতা, ফল, ফুল, বন-বীণা অলিকুল;  
মধ্যাহ্নে আসেন ছায়া, পরম শীতল কায়া,  
পবন ব্যাজন ধরে, পত্র যত নৃত্য করে,  
মহানন্দে অশ্বের বসতি॥

২

কিছু দিনে উজ্জ্বলনয়ন,  
কুরঙ্গ সহসা আসি দিল দরশন।  
বিস্ময়ে চৌদিকে চায়, যা দেখে বাগানে তায়,  
কতক্ষণে হেরি অশ্বে কহে মনে মনে;—  
“হেন রাজ্যে এক প্রজা এ দুখ না সহে!  
তোমার প্রসাদ চাই, শুন হে বন-গোঁসাই  
অাপদে, বিপদে দেব, পদে দিও ঠাই॥”

৩



এক পার্শ্ব করি অধিকার,      আরস্তিল কুরঙ্গ বিহার;  
খাইল অনেক ঘাস,      কে গণিতে পারে গ্রাস?  
অাহার করণান্তরে      করিল পান নির্ঝরে;  
পরে মৃগ তরুতলে      নিদ্রা গেল কুতূহলে—  
গৃহে গৃহস্বামী যথা বলী স্বত্ববলে॥

৪

বাক্যহীন ক্রোধে অশ্ব, নিরখি এ লীলা,  
ভোজবাজি কিম্বা স্বপ্ন!      নয়ন মুদীলা;  
উন্মীলি ক্ষণেক পরে কুরঙ্গে দেখিলা,  
রঙ্গে শুয়ে তরুতলে;      দ্বিগুণ অাগুন হৃদে জ্বলে;  
তীক্ষ্ণ ক্ষুর আঘাতনে ধরণী ফাটিল,  
ভীম হেষ্ণা গগনে উঠিল।  
প্রতিধ্বনি চৌদিকে জাগিল॥

৫

নিদ্রাভঙ্গে মৃগবর      কহিলা, “ওরে বর্ঝর!  
কে তুই, কত বা বল?  
সং পড়সীর মত      না থাকিবি, হবি হত।  
কুরঙ্গের উজ্জ্বল নয়ন ভাতিল সরোষে যেন দুইটি তপন

৬

হয়ের হৃদয়ে হৈল ভয়,      ভাবে এ সামান্য পশু নয়,  
শিরে শৃঙ্গ শাখাময়!

প্রতি শৃঙ্গ শূলের আকার  
বুঝি বা শূলের তুল্য ধার,  
কে আমারে দিবে পরিচয়?

৭

মাঠের নিকটে এক মৃগয়ী থাকিত,  
অশ্ব তারে বিশেষ চিনিত।  
ধরিতে এ অশ্ববরে, নানা ফাঁস নিরন্তরে  
মৃগয়ী পাতিত।  
কিন্তু সৌভাগ্যের বলে, তুরঙ্গম মায়া-ছলে  
কড়ু না পড়িত॥

৮

কহিল তুরঙ্গ;—“পশু উচ্চশৃঙ্গধারী—  
মোর রাজ্য এবে অধিকারী;  
না চাহিল অনুমতি, কর্কশভাষী সে অতি;  
হও হে সহায় মোর, মারি দুই জনে চোর॥”

৯

মৃগয়ী করিয়া প্রতারণা, কহিলা, “হা! এ কি বিড়ম্বনা!  
জানি সে পশুরে আমি, বনে পশুকুলে স্বামী,  
শার্দূলে, সিংহেরে নাশে, দক্ষে বন বিষম্বাসে;  
একমাত্র কেবল উপায়;—  
মুখস ও মুখে পর, পৃষ্ঠে চর্ম্মাসন ধর,

আমি সে আসনে বসি, করে ধনুর্কাণ আসি,  
তা হলে বিজয় লভা যায়॥”

১০

হায়! ক্রোধে অন্ধ অশ্ব, কুছলে ডুলিল;  
লাফে পৃষ্ঠে দুষ্ট সাদী অমনি চড়িল।  
লোহার কণ্টকে গড়া অস্ত্র, বাঁধা পাদুকায়,  
তাহার আঘাতে প্রাণ যায়।  
মুখস নাশিল গতি, ভয়ে হয় ক্ষিপ্তমতি,  
চলে সাদী যে দিকে চালায়॥

১১

কোথা অরি, কোথা বন, সে সুখের নিকেতন  
দিনান্তে হইলা বন্ধী আঁধার-শালায়।  
পরের অনিষ্ট হেতু ব্যগ্র যে দুর্মতি,  
এই পুরস্কার তার কহেন ভারতী;  
ছায়া সম জয় যায় ধর্মের সংহতি॥

## দেবদৃষ্টি

শচী সহ শচীপতি স্বর্ণ-মেঘাসনে,  
বাহিরিলা বিশ্ব দরশনে।  
আরোহি বিচিত্র রথ,  
চলে সঙ্গে চিত্ররথ,  
নিজদলে বিমণ্ডিত অস্ত্র আভরণে,  
রাজাজ্ঞায় আশুগতি বহিলা বাহনে।  
হেরি নানা দেশ সুখে,  
হেরি বহু দেশ দুঃখে—

ধর্মের উন্নতি কোন স্থলে;  
কোথাও বা পাপ শাসে বলে—  
দেব অগ্রগতি বঙ্গে উতরিল।  
কহিলা মাহেন্দ্র সতী শচী সুলোচনা,  
কোন্ দেশে এবে, গতি,  
কহ হে প্রাণের পতি,  
এ দেশের সহ কোন দেশের তুলনা?  
উত্তরিল মধুর বচনে  
বাসব, লো চন্দ্রাননে,  
বঙ্গ এ দেশের নাম বিখ্যাত জগতে।  
ভারতের প্রিয় মেয়ে  
মা নাই তাহার চেয়ে  
নিত্য অলঙ্কৃত হীরা, মুক্ত, মরকতে।  
সম্মেহে জাহ্নবী তারে  
মেখলেন চারি ধরে  
বরুণ ধোয়েন পা দু'খানি।  
নিত্য রক্ষকের বেশে  
হিমাদ্রি উত্তর দেশে  
পরেশনাথ আপনি  
শিরে তার শিরোমণি  
সেই এই বঙ্গভূমি শুন লো ইন্দ্রাণি!  
দেবাদেশে আশুগতি  
চলিলেন মৃদুগতি

উঠিল সহসা ধ্বনি  
সভয়ে শচী আমনি ইন্দ্রে সুধিলা,—  
নীচে কি হতেছে রণ  
কহ সখে বিবরণ

হেন দেশে হেন শব্দ কি হেতু জন্মিলা?  
চিত্ররথ হাত জোড় করি,  
কহে, শুন, ত্রিদিব-ঈশ্বরী!  
'বিবাহ করিয়া এক বালক যাইছে,  
পত্নী আসে দেখ তার পিছে।'  
সুধাংশুর অংশুরূপে নয়ন-কিরণ  
নীচদেশে পড়িল তখন।

## গদা ও সদা

গদা সদা নামে  
কোন এক গ্রামে  
ছিল দুই জন।  
দূর দেশে যাইতে হইল;  
দুজনে চলিল।  
ভয়ানক পথ—পাশে পশু ফণী বন,  
ভল্লুক শাদ্দুল তাহে গজের্জ অনুক্ষণ।  
কালসর্প যেমতি বিবরে,  
তঙ্কর লুকায়ে থাকে গিরির গহ্বরে;  
পথিকের অর্থ অপতরে,  
কখন বা প্রাণনাশ করে।  
কহে সদা গদারে আহ্বানি  
কর কিবা পশি মোর পাণি  
ধর্ম্মে সাক্ষী মানি,  
আজি হতে আমরা দুজন  
হ'নু একপ্রাণ একমন,—  
সিন্ধু অনুসিন্ধু যথা—জান সে কাহিনী।

আমার মঙ্গল যাহে,  
তোমার মঙ্গল তাহে,  
কবচে ভেদিলে বাণ, বক্ষ ক্ষত যথা,  
অমঙ্গলে অমঙ্গল উভয়ের তথা।  
কহে গদা ধর্ম্মসাক্ষী করি,  
কিবা মোর তব কর ধরি,  
একাত্মা আমরা দোঁহে কি বাঁচি কি মরি।  
এইরূপে মৈত্র অালাপনে  
মনানন্দে চলিলা দুজনে।  
সতর্ক রক্ষকরূপে সদা গদা যেন  
বন পাশে একদৃষ্টে চাহে অনুক্ষণ,  
পাছে পশু সহসা করয়ে আক্রমণ।  
গদা চারি দিকে চায়,  
এরূপে উভয়ে যায়;

দেখে গদা সম্মুখে চাহিয়া  
থল্যে এক পথেতে পড়িয়া।  
দৌড়ে মুঢ় থল্যে তুলি  
হেরে কুতুহলে খুলি  
পূর্ণ থল্যে সুবর্ণমুদ্রায়,  
তোলা ভার, এত ভারি তায়।  
কহে গদা সহাস বদনে  
করেছিনু যাত্রা আজি আতি শুভক্ষণে  
আমরা দুজনে।  
'দুজনে?' কহিল সদা রাগে,  
'লোভ কি করিস্ তুই এ অর্থের ভাগে?  
মোর পূর্ব পুণ্যফলে  
ভাগ্যদেবী এই ছলে

মোরে অর্থ দিলা।  
পাপী তুই, অংশ তোরে  
কেন দিব, ক' তা মোরে  
এ কি বাললীলা?  
রবির করে রাশি পরশি রতনে  
বরাস্পের অাভা তার বাড়ায় যতনে;  
কিন্তু পড়ি মাটির উপরে  
সে কর কি কোন ফল ধরে?  
সং যে তাহার শোভা ধনে,  
অসং নিতান্ত তুই, জনম কুক্ষণে।  
এই কয়ে সদানন্দ থল্যে তুলে লয়ে  
চলিতে লাগিলা সুখে অগ্রসর হয়ে।  
বিস্ময়ে অবাক্ গদা চলিল পশ্চাতে,  
বামন কি কভু পায় চারু চাঁদে হাতে?  
এই ভাবি অতি ধীরে ধীরে  
গেল গদা তিতি অশ্রনীরে।  
দুই পাশে শৈলকুল ভীষণ-দর্শন,  
শুঙ্গ যেন পরশে গগন।  
গিরিশিরে বরষায় প্রবলা যেমতি  
ভীমা স্রোতস্বতী,  
পথিক দুজনে হেরি তঙ্করের দল  
নাবি নীচে করি কোলাহল

উভে আক্রমিল।  
সদা অতি কাতরে কহিল,  
শুন ভাই, পাঞ্চালে যেমতি,  
বিষ্ণু রথিপতি,  
জিনি লক্ষ রাজে শুর কৃষ্ণায় লভিল,

মার চোরে করি রণ-লীলা।  
এই ধন নিও পরে বাঁটি  
হিসাবে করিয়া আঁটাআঁটি,  
তস্করদলের মাথা কাটি।  
কহে গদা, পাপী অামি, তুমি সৎজন,  
ধর্মবলে নিজধন করহ রক্ষণ।  
তস্কর-কুল-ঈশ্বরে  
কহিল সে যোড়করে,  
অধিপতি ওই জন ভাই,  
সঙ্গী মাত্র অামি ওর, ধর্মের দোহাই।  
সঙ্গী মাত্র যদি তুই, যা চলি বর্বর,  
নতুবা ফেলিব কাটি, কহিল তস্কর।  
ফাঁদে বাঁধা পাখী যথা পাইলে মুকতি,  
উড়ি যায় বায়ুপথে অতি দ্রুতগতি,  
গদা পলাইল।  
সদানন্দ নিরানন্দে বিপদে পড়িল।  
অালোক থাকিতে তুচ্ছ কর তুমি যারে,  
বঁধু কি তোমার কড়ু হয় সে আঁধারে?  
এই উপদেশ কবি দিলা এ প্রকারে।



## কুকুট ও মণি

খুটিতে খুটিতে ক্ষুদ কুকুট পাইল  
একটি রতন;  
বণিকে সে ব্যগ্রে জিজ্ঞাসিল;  
“ঠোঁটের বলে না টুটে, এ বস্তু কেমন?”

বণিক কহিল,—“ভাই,  
এ হেন অমূল্য রত্ন, বুঝি, দুটি নাই।”  
হাসিল কুকুট শুনি;—“তগুলের কণা  
বহুমূল্যতর ভাবি;—কি আছে তুলনা?”  
“নহে দোষ তোর, মুঢ়, দৈব এ ছলনা,  
জ্ঞান-শূন্য করিল গৌসাই!”—  
এই কয়ে বণিক ফিরিল।

মূর্খ যে, বিদ্যার মূল্য কভু কি সে জানে?  
নর-কুলে পশু বলি লোকে তারে মানে;—  
এই উপদেশ কবি দিলা এই ভানে।

## সূর্য ও মৈনাক-গিরি

উদয়-অচলে,  
দিবা-মুখে এক-চক্রে দিলা দরশন,  
অংশু-মালা গলে,  
বিতরি সুবর্ণ-রশ্মি চৌদিকে তপন।  
ফুটিল কমল জলে  
সূর্যমুখী সুখে স্থলে,  
কোকিল গাইল কলে,  
আমোদি কানন।

জাগে বিশ্বে নিদ্রা ত্যজি বিশ্ববাসী জন;  
পুনঃ যেন দেব স্রষ্টা সৃজিলা মহীরে;  
সজীব হইলা সবে জনমি, অচিরে।  
অবহেলি উদয়-অচলে,  
শূন্য-পথে রথবর চলে;

বাড়িতে লাগিল বেলা,  
পদ্মের বাড়িল খেলা,  
রজনী তারার মেলা সর্বত্র ভাঙ্গিল;—  
কর-জালে দশ দিক্ হাসি উজলিল।  
উঠিতে লাগিলা ভানু নীল নভঃস্থলে;  
দ্বিতীয়-তপন-রূপে নীল সিন্ধু-জলে  
মৈনাক ভাসিল।

কহিল গম্ভীরে শৈল দেব দিবাকরে;—  
“দেখি তব ধীর গতি দুখে আঁখি ঝরে;  
পাও যদি কষ্ট,—এস, পৃষ্ঠাসন দিব;  
যেখানে উঠিতে চাও, সবলে তুলিবা।”  
কহিলা হাসিয়া ভানু;—“তুমি শিষ্টমতি;  
দৈববলে বলী আমি, দৈববলে গতি।”

মধ্যাকাশে শোভিল তপন,—  
উজ্জ্বল-যৌবন, প্রচণ্ড-কিরণ।  
তাপিল উত্তাপে মহী; পবন বহিলা  
অাণুনের শ্বাস-রূপে; সব শুকাইলা

শুকাল কাননে ফুল;  
প্রাণিকুল ভয়াকুল;  
জলের শীতল দেহ দহিয়া উঠিল;  
কমলিনী কেবল হাসিল!  
হেন কালে পতনের দশা,  
আ মরি; সহসা  
আসি উতরিল;—  
হিরন্ময় রাজাসন ত্যজিতে হইল।

অধোগামী এবে রবি,  
বিষাদে মলিন-ছবি,  
হেরি মৈনাকেরে পুনঃ নীল সিন্ধু-জলে,  
সম্ভাষি কহিলা কুতুহলে;—  
“পাইতেছি কষ্ট, ভাই, পূর্বাসন লাগি;  
দেহ পৃষ্ঠাসন এবে, এই বর মাগি;  
লও ফিরে মোরে, সখে, ও মধ্য-গগনে;—  
অবার রাজত্ব করি, এই ইচ্ছা মনে।”

হাসি উত্তরিল শৈল;—“হে মুঢ় তপন,  
অধঃপাতে গতি যার কে তার রক্ষণ!  
রমার থাকিলে কুপা, সবে ভালবাসে;—  
কাঁদ যদি, সঙ্গে কাঁদে; হাস যদি, হাসে;  
চাকেন বদন যবে মাধব-রমণী,  
সকলে পলায় পড়ে, দেখি যেন ফণী।”

## মেঘ ও চাতক

উড়িল আকাশে মেঘ গরজি ভৈরবে;—  
ভানু পলাইল ত্রাসে;  
তা দেখি তড়িৎ হাসে;  
বহিল নিশ্বাস ঝড়ে;  
ভাঙ্গে তরু মড়-মড়ে;  
গিরি-শিরে চূড়া নড়ে,  
যেন ভূ-কম্পনে;  
অধীরা সভয়ে ধরা সাধিলা বাসবে।

আইল চাতক-দল,  
মাগি কোলাহলে জল—  
“তুষায় আকুল মোরা, ওহে ঘনপতি!  
এ জ্বালা জুড়াও, প্রভু, করি এ মিনতি।”  
বড় মানুষের ঘরে ব্রতে, কি পরবে,  
ভিখারী-মণ্ডল যথা আসে ঘোর রবে;—  
কেহ আসে, কেহ যায়;  
কেহ ফিরে পুনরায়  
আবার বিদায় চায়;  
ত্রস্ত লোভে সবে;—  
সেৰূপে চাতক-দল,  
উড়ি করে কোলাহল;—  
“তুষায় আকুল মোরা, ওহে ঘনপতি!  
এ জ্বালা জুড়াও জলে, করি এ মিনতি।”

রোষে উত্তরিলা ঘনবর;—  
“অপরে নির্ভর যার, অতি সে পামর!  
বায়ু-রূপ দ্রুত রথে চড়ি,  
সাগরের নীল পায়ে পড়ি,  
অনিয়াছি বারি;—  
ধরার এ ধার ধারি।

এই বারি পান করি,

মেদিনী সুন্দরী  
বৃক্ষ-লতা-শস্যচয়ে  
স্তন-দুগ্ধ বিতরয়ে

শিশু যথা বল পায়,  
সে রসে তাহারা খায়,  
অপরপ রূপ-সুধা বাড়ে নিরন্তর;  
তাহারা বাঁচায়, দেখ, পশু-পক্ষী-নর।

নিজে তিনি হীন-গতি;  
জল গিয়া অনিবারে নাহিক শকতি;  
তেঁই তার হেতু বারি-ধারা।—  
তোমরা কাহারা?  
তোমাদের দিলে জল,  
কভু কি ফলিবে ফল?  
পাখা দিয়াছেন বিধি;  
যাও, যথা জলনিধি;  
যাও, যথা জলাশয়;—  
নদ-নদী-তড়াগাদি, জল যথা রয়  
কি গ্রীষ্ম, কি শীত কালে,  
জল যেখানে পালে,  
সেখানে চলিয়া যাও, দিনু এ যুকতি।”

চাতকের কোলাহল আতি।  
ক্রোধে তড়িতে ঘন কহিলা,—  
“অগ্নি-বাণে তাড়াও এ দলে।”—  
তড়িৎ প্রভুর আজ্ঞা মানিলা।  
পলায় চাতক, পাখা জ্বলে।

যা চাহ, লভ তা সদা নিজ-পরিশ্রমে:  
এই উপদেশ কবি দিলা এই ক্রমে।

## পীড়িত সিংহ ও অন্যান্য পশু

অধিক-বয়স-ভরে হয়ে হীন-গতি,  
সিংহ কৃশ অতি।  
জনরব-রূপ-স্রোতে,  
ভাসাল ঘোষণা-পোতে,  
এই কথা।;—“মৃগরাজ মগ্ন রাজকাজে;  
প্রজাবর্গ, রাজপুরে পূজ কুল-রাজে।”  
প্রভু-ভক্তি-মদে মাতি  
কুরঙ্গ, তুরঙ্গ, হাতী,  
করে করি রাজকর,  
পালা-মতে নিরন্তর,  
গেলা চলি রাজ-নিকেতনে,  
অতি হৃষ্ট মনে।

শৃগাল-কুলের পালা আসি উতরিল;  
কুল-মন্ত্রী সভা আহ্বানিল;  
কি ভেট, কি উপহার,  
কি পানায়, কি আহ্বার,—  
এই লয়ে ঘোর তর্ক-বিতর্ক হইল।  
হেন কালে অার মন্ত্রী সহাসে কহিল;—  
“তর্কের যে অলঙ্কার তোমরা সকলে,  
এ বিশ্বে এ বিশ্ব-জনে বলে;  
কিন্তু কহ দেখি, শুনি, কেন স্থানে-স্থানে  
বহুবিধ পদ-চিহ্ন রাজ-গৃহ-পানে?—  
ফিরে যে আসিছে, তার চিহ্ন কে মুছিল?”

চতুর যে সর্বদর্শী, বিপদের জালে  
পদ তার পড়িতে পারে কোন্ কালে?

## সিংহ ও মশক

শঙ্খনাদ করি মশা সিংহে আক্রমিল;  
ভব-তলে যত নর,  
ত্রিদিবে যত অমর,  
আর যত চরাচর,  
হেরিতে অদ্ভুত যুদ্ধ দৌড়িয়া আইল।  
হল-রূপ শূলে বীর, সিংহেরে বিধিল।  
অধীর ব্যথায় হরি,  
উচ্চ-পুচ্ছে ক্রোধ করি,  
কহিলা;—“কে তুই, কেন  
বৈরিভাব তোর হেন?  
গুপ্তভাবে কি জন্য লড়াই?—  
সম্মুখ-সমর কর; তাই আমি চাই।  
দেখিব বীরত্ব কত দূর,  
আঘাতে করিব দর্প-চুর;  
লক্ষ্মণের মুখে কালি  
ইন্দ্রজিতে জয়-ডালি,  
দিয়াছে এ দেশে কবি।”  
কহে মশা —“ভীরু, মহাপাপি,  
যদি বল থাকে, বিষম-প্রতাপি,  
অন্যায়-ন্যায়-ভাবে,  
ক্ষুধায় যা পায়, খাবে;  
ধিক্, দুষ্টমতি!  
মারি তোরে বন-জীবে দিব, রে, কু-মতি

হইল বিষম রণ, তুলনা না মিলে;  
ভীম দুর্ঘোষনে,  
ঘোর গদা-রণে,  
হৃদ দ্বৈপায়নে,  
তীরস্থ সে রণ-ছায়া পড়িল সলিলে;  
ডরাইয়া জল-জীবী জল-জন্তুচয়ে,  
সভয়ে মনেতে ভাবিল,

প্রলয়ে বুঝি এ বীরেন্দ্র-দ্বয় এ সৃষ্টি নাশিল!

মেঘনাদ মেঘের পিছনে,  
অদৃশ্য অাঘাতে যথা রণে;  
কেহ তারে মারিতে না পায়,  
ভয়ঙ্কর স্বপ্নসম অাসে,—এসে যায়,  
জর-জরির শ্রী রামের কটক লঙ্কায়।  
কডু নাকে, কডু কাণে,  
ত্রিশূল-সদৃশ হানে  
হল, মশা বীর।  
না হেরি অরিরে হরি,  
মুহূর্মুহ নাদ করি,  
হইলা অধীর।  
হায়! ক্রোধে হৃদয় ফাটিল;—  
গত-জীব মৃগরাজ ভূতলে পড়িল!

ক্ষুদ্র শত্রু ভাবি লোক অবহেলে যারে,  
বহুবিধ সঙ্কটে সে ফেলাইতে পারে;—  
এই উপদেশ কবি দিলা অলঙ্কারে।



## ঢাকাবাসীদিগের অভিনন্দনের উত্তরে

নাহি পাই নাম তব বেদে কি পুরাণে,  
কিন্তু বঙ্গ-অলঙ্কার তুমি যে তা জানি  
পূর্ক-বঙ্গে। শোভ তুমি এ সুন্দর স্থানে  
ফুলবৃন্তে ফুল যথা, রাজাসনে রাণী॥  
প্রতি ঘরে বাঁধা লক্ষ্মী (থাকে এইখানে)  
নিত্য অতিথিনী তব দেবী বীণাপাণি।  
পীড়ায় দুর্বল আমি, তেঁই বুঝি আনি  
সৌভাগ্য, অর্পিলা মোরে (বিধির বিধানে)  
তব করে, হে সুন্দরি! বিপজ্জাল যবে  
বেড়ে কারো, মহৎ যে সেই তার গতি।  
কি হেতু মৈনাক গিরি ডুবিল অর্ণবে?  
দ্বৈপায়ন হ্রদতলে কুরুকুলপতি?  
যুগে যুগে বসুন্ধরা সাধেন মাধবে,  
করিও না ঘৃণা মোরে, তুমি, ভাগ্যবতি।

## পুরুলিয়া[১]

পাষণময় যে দেশ, সে দেশে পড়িলে  
বীজকুল, শস্য তথা কখন কি ফলে?  
কিন্তু কত মনানন্দ তুমি মোরে দিলে,  
হে পুরুল্যে! দেখাইয়া ভকত-মণ্ডলে!  
শ্রীভ্রষ্ট সরস সম, হায়, তুমি ছিলে,  
অজ্ঞান-তিমিরাচ্ছন্ন এ দূর জঙ্গলে;

এবে রাশি রাশি পদ্ব ফোটে তব জলে,  
পরিমল-ধনে ধনী করিয়া আনিলে!  
প্রভুর কি অনুগ্রহ! দেখ ভাবি মনে,  
(কত ভাগ্যবান্ তুমি কব তা কাহারে?)  
রাজাসন দিলা তিনি ভূপতিত জনে।  
উজলিলা মুখ তব বঙ্গের সংসারে;  
বাড়ুক সৌভাগ্য তব এ প্রার্থনা করি,  
ভাসুক সত্যতা-স্রোতে নিত্য তব তরি।

1. ↑ পুরুলিয়ার শ্রীষ্ট-মণ্ডলীকে লক্ষ্য করিয়া লিখিত

## পরেশনাথ গিরি

হেরি দূরে উদ্ধশিরঃ তোমার গগনে,  
অচল, চিত্রিত পটে জীমূত যেমতি।  
ব্যামকেশ তুমি কি হে, (এই ভাবি মনে)  
মজি তপে, ধরেছ ও পাষণ-মুরতি?  
এ হেন ভীষণ কায়া কার বিশ্বজনে?  
তবে যদি নহ তুমি দেব উমাপতি,  
কহ, কোন রাজবীর তপোব্রতে ব্রতী—  
খচিত শিলার বস্ম কুসুম-রতনে  
তোমার? যে হর-শিরে শশিকলা হাসে,  
সে হর কিরীটরাপে তব পুণ্য শিরে,  
চিরবাসী, যেন বাঁধা চিরপ্রেমপাশে!  
হেরিলে তোমায় মনে পড়ে ফান্তনিরে  
সেবিল বীরেশ যবে পাশুপত আশে  
ইন্দ্রকীল নীলচুড়ে দেব ধূর্জটিরে।

## কবির ধর্মপুত্র

(শ্রীমান্ শ্রীষ্টদাস সিংহ)

হে পুত্র, পবিত্রতর জনম গৃহিলা  
আজি তুমি, করি স্নান যর্দনের নীরে  
সুন্দর মন্দির এক আনন্দে নির্মিলা  
পবিত্রাত্মা বাস হেতু ও তব শরীরে;  
সৌরভ কুসুমে যথা, অাসে যবে ফিরে  
বসন্ত, হিমালুকালে। কি ধন পাইলা—  
কি অমূল্য ধন বাছা, বুঝিবে অচিরে,  
দৈববলে বলী তুমি, শুন হে, হইলা!  
পরম সৌভাগ্য তব। ধর্ম-বর্ম ধরি  
পাপ-রূপ রিপু নাশো এ জীবন-স্থলে;  
বিজয়-পতাকা তোলি রথের উপরি;  
বিজয় কুমার সেই, লোকে যারে বলে  
শ্রীষ্টদাস, লভো নাম, আশীর্বাদ করি,  
জনক জননী সহ, প্রেম কুতূহলে!

## পঞ্চকোটস্য রাজশ্রী

হেরিনু রমারে অামি নিশার স্বপনে;  
হাঁটু গাড়ি হাতী দুটি শুঁড়ে শুঁড়ে ধরে—  
পদ্মাসন উজলিত শতরত্ন-করে,  
তুই মেঘরাশি-মাঝে, শোভিছে অম্বরে,  
রবির পরিধি যেন। রূপের কিরণে  
আলো করি দশ দিশ; হেরিনু নয়নে,  
সে কমলাসন-মাঝে ডুলাতে শঙ্করে  
রাজরাজেশ্বরী, যেন কৈলাস-সদনে।  
কহিলা বাগ্‌দেবী দাসে (জননী যেমতি  
অবোধ শিশুরে দীক্ষা দেন প্রেমাদরে),  
“বিবিধ আছিল পুণ্য তোর জন্মান্তরে,  
তুই দেখা দিলা তোরে আজি হৈমবতী  
যেৰূপে করেন বাস চির রাজ-ঘরে  
পঞ্চকোট;-পঞ্চকোট—ওই গিরিপতি।”

## পঞ্চকোট-গিরি বিদায়-সঙ্গীত

হেরেছিনু, গিরিকবর! নিশার স্বপনে,  
অদ্ভুত দর্শন!

হাঁটু গাড়ি হাতী দুটি ঝুঁড়ে ঝুঁড়ে ধরে,  
কনক-অাসন এক, দীপ্ত রত্ন-করে

দ্বিতীয় তপন!

যেই রাজকুলখ্যাতি তুমি দিয়াছিলি,  
সেই রাজকুললক্ষ্মী দাসে দেখা দিলা,

শোভি সে অাসন

হে সখে! পাষণ তুমি, তবু তব মনে  
ভাবরূপ উৎস, জানি, উঠে সর্বক্ষণে।  
ভেবেছিনু, গিরিবর! রমার প্রসাদে,

তঁর দয়াবলে,

ভাঙা গড় গড়াইব, জলপূর্ণ করি  
জলশূন্য পরিখায়; ধনুর্বাণ ধরি দ্বারিগণ  
অাবার রক্ষিবে দ্বার অতি কুতূহলে।

## সমাধি-লিপি

দাঁড়াও, পথিক-বর, জন্ম যদি তব  
বঙ্গে! তিষ্ঠ ক্ষণকাল! এ সমাধিস্থলে  
(জননীৰ কোলে শিশু লভয়ে যেমতি  
বিরাম) মহীর পদে মহানিদ্রাবৃত  
দত্তকুলোদ্ভব কবি শ্রীমধুসূদন!

যশোরে সাগর দাড়ী কবতক্ষ-তীরে  
জন্মভূমি, জন্মদাতা দত্ত মহামতি  
রাজনারায়ণ নামে, জননী জাহ্নবী!

## পাণ্ডববিজয়

প্রথম সর্গ

কেমনে সংহারি রণে কুরুকুলরাজে,  
কুরুকুল-রাজাসন লভিলা দ্বাপরে  
ধর্মরাজ;—সে কাহিনী, সে মহাকাহিনী,  
নব রঙ্গে বঙ্গজনে, উরি এ অাসরে,  
কহ, দেবি! গিরি-গৃহে সুকালে জনমি  
(অাকাশ-সম্ভবা ধাত্রী কাদম্বিনী দিলে  
স্তনামৃতরূপে বারি) প্রবাহ যেমতি  
বহি, ধায় সিন্ধুমুখে, বদরিকাশ্রমে,  
ও পদ-পালনে পুষ্ট কবি-মনঃ, পুনঃ  
চলিল, হে কবি-মাতঃ, যশের উদ্দেশে।  
যথা সে নদের মুখে সুমধুর ধ্বনি,  
বহে সে সঙ্গীতে যবে মঞ্জ, কুঞ্জান্তরে  
সমদেশে; কিন্তু ঘোর কল্লোল, যেখানে  
শিলাময় স্থল রোধে অবিরল গতি;—  
দাসের রসনা অাসি রস নানা রসে,  
কড়ু রৌদ্রে, কড়ু বীরে, কড়ু বা করুণে—  
দেহ ফুলশরাসন, পঞ্চফুলশরে।



## দুর্যোধনের মৃত্যু

“দেখ, দেব, দেখ চেয়ে”, কাতরে কহিলা  
কুরুরাজ কৃপাচার্য্যে,—“আসিছেন ধীরে  
নিশীথিনী; নাহি তারা কবরী-বন্ধনে—  
না শোভে ললাটদেশে চারু নিশামণি!  
শিবির-বাহিরে মোরে লহ কৃপা করি,  
মহারথ! রাখ লয়ে, যথায় ঝরিবে  
এ ভূনত-শিরে এবে শিশিরের ধারা  
ঝরে যথা শিশুশিরে অবিরল বহি  
জননীৰ অক্ষুজল, কালগ্রাসে যাবে  
সে শিশু।” লাইলা সবে ধরাধরি করি  
শিবির-বাহিরে শূরে—ভগ্ন-উরু রণে!

মহাযত্নে কৃপাচার্য্য পাতিল ভূতলে  
উত্তরী। বিষাদে হাসি কহিলা নৃমণি;—  
“কার হেতু এ সুশয়্যা, কৃপাচার্য্য রথি?  
পড়িঁনু ভূতলে, প্রভু, মাতৃগর্ভ ত্যজি;—  
সেই বাল্যাসন ভিন্ন কি অাসন সাজে  
অস্তিম্বে? উঠাও বস্ত্র, বসি হে ভূতলে।  
কি শয়্যায় সুপ্ত অাজি কুরুবীর্য্যরূপী  
গাঙ্গৈয়? কোথায় গুরু দ্রোণাচার্য্য রথী,  
কোথা অঙ্গপতি কর্ণ? অার রাজা যত  
ক্ষত্র-ক্ষত্র-পুষ্প, দেব! কি সাধে বসিবে  
এ হেন শয়্যায় হেথা দুর্যোধন অাজি?  
যথা বনমাঝে বহি জ্বলি নিশাযোগে  
অাকর্ষি পতঙ্গচয়ে, ভস্মেন তা সবে  
সর্ব্বভুক—রাজদলে অাহ্বানি এ রণে—

বিনাশি আমি, দেব! নিঃক্ষত্র করিনু  
ক্ষত্রপূর্ণ কর্ম্মক্ষত্র নিজ কর্ম্মদোষে।  
কি কাজ আমার আর বৃথা সুখভোগে?  
নির্বাণ পাবক আমি, তেজশূন্য, বলি।  
ভস্মমাত্র! এ যতন বৃথা কেন তব?”

সরায়ে উত্তরী শূর বসিলা ভূতলে।

নিকটে বসিলা কৃপ কৃতবর্মা রথী  
বিষাদে নীরব দোহে;—আসি নিশীথিনী,  
মেঘরোপ ঘোমটায় বদন অাবরি,  
উচ্চ বায়ু-রূপ শ্বাসে সঘনে নিশ্বাসি;—  
বৃষ্টি-ছলে অশ্রুবারি ফেলিলা ভূতলে।  
কাতরে কহিলা চাহি কৃতবর্মা পানে  
রাজেন্দ্র; “এ হেন ক্ষেত্রে, ক্ষত্রচুড়ামণি,  
ক্ষত্র-কুলোদ্ভব, কহ, কে আছে ভারতে,  
যে না ইচ্ছে মরিবারে? যেখানে, যে কালে  
অক্রমেন যমরাজ; সমপাড়া-দায়ী  
দণ্ড তাঁর,— রাজপুরে, কি ক্ষুদ্র কুটীরে,  
সম ভয়ঙ্কর প্রভু, সে ভীম মুরতি।  
কিন্তু হেন স্থলে তাঁরে আতঙ্ক না করি  
আমি!—এই সাধ ছিল চিরকাল মনে।  
যে স্তম্ভের বলে, শির উঠায় আকাশে  
উচ্চ রাজ-অট্টালিকা; সে স্তম্ভের রূপে  
ক্ষত্রকুল-অট্টালিকা ধরিনু স্ববলে  
ভূভারতে। ভূপতিত এবে কালে আমি;  
দেখ চেয়ে চারি দিকে ভগ্ন শত ভাগে  
সে সুঅট্টালিকা চূর্ণ এ মোর পতন!  
গড়ায় এক্ষেত্রে পড়ি গৃহচুড়া কত!

আর যত অলঙ্কার—কার সাধ্য গণে?  
কিন্তু চেয়ে দেখ সবে, কি আশ্চর্য্য! দেখ—  
রকত বরণে দেখ, সহসা আকাশে  
উদিছেন এ পৌরব বংশ-আদি যিনি,  
নিশানাথ! দুর্যোগধনে ভূশয্যায় হেরি  
কুবরণ হইলা কি শোকে সুধানিধি?”  
পাণ্ডব-শিবির পানে ক্ষণেক নিরাখি  
উত্তরিলে কৃপাচার্য্য;—“হে কৌরবপতি,  
নহে চন্দ্র যাহা, রাজা, দেখিছ আকাশে,  
কিন্তু বৈজয়ন্তী তব সর্ষভূকরূপে।  
রিপুকুল-চিতা, দেব, জ্বলিয়া উঠিল।  
কি বিষাদ আর তবে? মরিছে শিবিরে  
অগ্নি-তাপে ছটফটি ভীম দুষ্টমতি;  
পুড়িছে অর্জুন, রায়, তার শরানলে,

পুড়িল যেমতি হেথা সৈন্যদল তব!  
অস্ত্রিমে পিতায় স্মরে যুধিষ্ঠির এবে;  
নকুল ব্যাকুলচিত সহদেব সহ!  
অার অার বীর যত এ কাল সমরে  
পাইয়াছে রক্ষা যারা, দাবদন্ধ বনে  
অাশে পাশে তরু যথা;—দেখ মহামতি।

## সিংহল-বিজয়

স্বৰ্ণসৌধে সুধাধরা যক্ষেন্দ্রমোহিনী  
মুরজা, শুনি সে ধ্বনি অলকা নগরে,  
বিস্ময়ে সাগর পানে নিরখি, দেখিলা  
ভাসিছে সুন্দর ডিম্বা, উড়িছে আকাশে

পতাকা, মঙ্গলবাদ্য বাজিছে চৌদিকে!  
রুষি সতী শশিমুখী সখীরে কহিলা;—  
হেদে দেখ, শশিমুখি, আঁখি ফুটি খুলি,  
চলিছে সিংহলে ওই রাজ্যলাভ-লোভে  
বিজয়, স্বদেশ ছাড়ি লক্ষ্মীর আদেশে!  
কি লজ্জা! থাকিতে প্রাণ না দিব লইতে  
রাজ্য ওরে আমি, সহ! উদ্যানস্বরূপে  
সাজানু সিংহলে কি লো দিতে পরজনে?  
জ্বলে রাগে দেহ, যদি স্মরি শশিমুখি,  
কমলার অহঙ্কার; দেখিব কেমনে  
স্বদাসে আমার দেশ দানেন ইন্দিরা?  
জলধি জনক তার; তেঁই শান্ত তিনি  
উপরোধে। যা, লো সহ, ডাক্ সারথিরে  
আনিতে পুষ্পকে হেথা। বিরাজেন যথা  
বায়ুরাজ, যাব আজি; প্রভঞ্নে লয়ে  
বাধাব জঞ্জাল, পরে দেখিব কি ঘটে?

স্বৰ্ণতেজঃপুঞ্জ রথ আইল দুয়ারে  
ঘর্ঘরি। হেষিল অশ্ব, পদ-আস্ফালনে  
সৃজি বিস্ফুলিঙ্গবৃন্দে। চড়িলা স্যনন্দে  
আনন্দে সুন্দরী, সাজি বিমোহন সাজে!

## হতাশা-পীড়িত হৃদয়ের দুঃখধ্বনি

ভেবেছিঁনু মোর ভাগ্য, হে রমাসুন্দরি,  
নিবাইবে সে রোষাণ্ণি,—লোকে যাহা বলে,  
হ্রাসিতে বাণীর রূপ তব মনে জ্বলে;—

ভেবেছিঁনু, হায়! দেখি, ভ্রান্তিভাব ধরি  
ডুবাইছ, দেখিতেছি, ক্রমে এই তরী  
অদয়ে, অতল দুঃখ-সাগরের জলে  
ডুবিনু; কি যশঃ তব হবে বঙ্গ-স্থলে?

# देवदानवीयम्

महाकाव्य

प्रथम सर्गः

काव्येकखानि रचिबारे चाहि,  
कहो कि छन्दः पछन्द, देवि!  
कहो कि छन्दः मनानन्द देवे  
मनीषबुन्दे ए सुवग्गदेशे?  
तोमार वीणा देह मोर हाते,  
बाजाइया ताय यशस्वी हवो,  
अमृतरूपे तव कृपावारी  
देहो जननि गो, टालि ए पेटे

## জীবিতাবস্থায় অনাদৃত কবিগণের সম্বন্ধে

ইতিহাস এ কথা কাঁদিয়া সদা বলে,  
জন্মভূমি ছেড়ে চল যাই পরদেশে।  
উরুপায় কবিগুরু ভিখারী অাছিল  
ওমর (অসভ্যকালে জন্ম তাঁর) যথা  
অমৃত সাগরতলে। কেহ না বুঝিল  
মূল্য সে মহামণির; কিন্তু যম যবে

গ্রাসিল কবির দেহ, কিছু কাল পরে  
বাড়িল কলহ নানা নগরে; কহিল  
এ নগর ও নগরে, “অামার উদরে  
জনম গ্রহিয়াছিল ওমর সুমতি।”  
আমাদের বাল্মীকির এ দশা; কে জানে,  
কোন্ কুলে কোন স্থানে জন্মিলা সুমতি।

## পণ্ডিতবর শ্রীযুক্ত ঈশ্বরচন্দ্র বিদ্যাসাগর মহাশয়কে লক্ষ্য করিয়া

শুনেছি লোকের মুখে পীড়িত আপনি  
হে ঈশ্বরচন্দ্র! বঙ্গে বিধাতার বরে  
বিদ্যার সাগর তুমি; তব সম মণি,  
মলিনতা কেন কহ চাকে তার করে?  
বিধির কি বিধি সুরি, বুঝিতে না পারি,  
হেন ফুলে কীট কেন পশিবারে পারে?  
করমনাশার স্রোত অপবিত্র বারি  
ঢালি জাহ্নবীর গুণ কি হেতু নিবারে?  
বঙ্গের সুচুড়ামণি করে হে তোমারে  
সৃজিলা বিধাতা, তোমা জানে বঙ্গজনে;  
কোন পীড়ারূপ অরি বাণাঘাতে পারে  
বিঁধিতে, হে বঙ্গরত্ন! এহেন রতনে?  
যে পীড়া ধনুক ধরি হেন বাণ হানে  
(রাম্ভসের রূপ ধরি), বুঝিতে কি পার,  
বিদীর্ণ বঙ্গের হিয়া সে নিষ্ঠুর বাণে?  
কবিপুত্র সহ মাতা কঁদে বারম্বার।




## পঞ্চকোট গিরি


কাটিলা মহেন্দ্র মর্ত্ত্যে বজ্র প্রহরণে  
পর্বতকুলের পাখা; কিন্তু হীনগতি  
সে জন্য নহ হে তুমি, জানি আমি মনে,  
পঞ্চকোট! রয়েছ যে,—লঙ্কায় যেমতি  
কুম্ভকর্ণ,—রক্ষ, নর, বানরের রণে—  
শূন্যপ্রাণ, শূন্য বল, তবু ভীমাকৃতি,—  
রয়েছ যে পড়ে হেথা, অন্য সে কারণে।


কোথায় সে রাজলক্ষ্মী, যার স্বর্ণ-জ্যোতি  
উজ্জ্বলিত মুখ তব? যথা অস্তাচলে  
দিনান্তে ভানুর কান্তি। তেয়গি তোমায়  
গিয়াছেন দূরে দেবী, তেঁই হে! এ স্থলে,  
মনোদুঃখে মৌন ভাব তোমার; কে পারে  
বুঝিতে, কি শোকানল ও হৃদয়ে জ্বলে?  
মণিহারা ফণী তুমি রয়েছ আঁধারে।

## ◆ Contributor ◆

 This ebook is auto generated using python from WikiSource (উইকিসংকলন) by [bongboi](#). Thanks to the volunteers over wikisource:


- Bodhisattwa
- অভিজিৎ দাস
- Santd3
- Hrishikes
- কামরুল ইসলাম শাহীন
- SushmitaSwarna
- Atudu
- 103.21.126.77

 Wikipedia has it's own epub generation system but somehow due to weird Styling and Font embedding those EPUBs invariably slows down the device in which you're reading. And Fonts get broken, some group members on [t.me/bongboi\\_req](https://t.me/bongboi_req) reported this, so decided to build those concisely via Python.


 Utmost care have been taken but due to non-survilance some ebook parts may be broken. If you find such please improve and submit or report to [@bongboi\\_req](#). So that those can be improved in future

## ◆ Disclaimer ◆



 Tele Boi does not own any content of this book. All the copyright is of respective authors/publishers of the books. [@bongboi](#) compiled this for Non-profit, educational and personal use, in favour of fair use.

 The content of the book is publically available in the [WikiSource](#).


 Do Not redistribute in a commercial way.


 Please buy the hardcopy of the books to support your favourite authors and/or publishers.


---

## ◆ সমাপ্তি ◆


পড়ে ভাল লাগলে বই কিনে রাখুন।

 করোনার প্রকোপের সময় বানানো বইগুলি। সবাই সুস্থ থাকুন, সুস্থ রাখুন।

 Bengali Language have very few EPUBs created. @bongboi started creating this as a hobby project and made more than 2000 EPUBs at this stage.

 Be a volunteer [@bongboi](#) or at [WikiSource](#) so that more ebooks become available to the public at large.

**Help People Help Yourself** 

আরও বই 

[টেলি বই](#)

[MOBI](#)